

山右石刻叢編

山右石刻叢編卷七

陽曲縣志卷之七 碑墓記 陽曲縣志卷之七 碑墓記 陽曲縣志卷之七 碑墓記

四

慶唐觀金錄齋頌

碑高四尺二寸五分廣二尺三寸一分二寸  
五行行四十八字分書今在浮山縣龍角山

大唐平陽郡龍角山慶唐觀 大聖祖(玄)元皇帝宮金錄齋

頌 并序

朝議郎左拾遺內供奉博陵崔明允墓

通直郎行河南府伊闕縣丞集賢院待 制兼校理 御

書史惟則書

空洞之中溟滓之際靈文尚矣混成朕焉混成者何象帝之  
先靈文者何龍漢之季五劫交周尊神遽運九炁列正 元

始□然治於流火之庭練於洞陽之館二儀得之以定位三  
景得之以發光赤明開圖碧落普度 ⑤元奄有 大道遂  
荒真宗 天法之以無倪皇仰之而未及犧軒應運堯舜乘  
時均至化而思齊酌⑤風而殆庶獨立千古湛兮若存首出  
百王悠兮不極矣粵若祖 聖系襲 神宗先 天不違後  
天縱代錫⑤慶遠派源流長 國家纂戎欽承前烈三合  
壹德 六葉同 道平陽郡⑤元宮者興王之肇地也惟  
初受命載告休徵權輿靈迹倣落祠宇昭彰於國史乃今  
昇平配永嘉瑞增修 廟大建 闕宮明白於 御碑因  
吾道爲 天下程由茲 地爲 天下式非夫至至孰能  
預之哉 皇帝御辯無爲齋心正一寤寐有感髣髴 真容  
昭 孝孫之精誠貽 烈祖之⑤訓 開元得 聖

象 天寶獲靈符丕慶再集而繁昌至教遂興而畢備極崇  
冊禮其高莫二袞龍克光於像設昇旒追尊於帝位雖猗那  
商頌生人周雅傳之於昔 今則過焉於鏤茲山會神之寓  
西對姑射北隣 天柱寔通仙之祕府也正殿肅穆廣庭森  
沈峯密左右松栝交隱摠虛無以靜深也石壇重階瓊甍環  
整隱訣參伍洞章護持三元表辰八月 降誕每至是日展  
法於斯脩金錄齋啓玉皇印 道家之寶王者之儀靡盛於  
此矣乃開 乾門闢 坤戶氣弓廣莫風和不周八卦行乎  
其中矣仰列宿躡魁剛落日淪陰夕時沆瀣六甲佐乎其旁  
矣仙侶頒次羽人步虛朝拜 九天醮祠 五老想鉤陳則  
黃雲垂覆存太乙則白鶴來翔其餘侍香玉童傳言玉女縹  
眳爐景徘徊元空求之希微宛如契合耳惟鎮 皇極叶

時邕外以廓清萬里戎夷向化內以乂安兆庶年穀滋稔滅  
格禱興昌光動植生成陰陽氣茂利兵所指則戢干戈靈官  
所臨則消疵厲矧威通上界 神降祺福景命來假

天子万年者乎觀主臣郭處寂虔恭是勤宿夜匪懈稟師之  
錄佩之嶽符躬執科儀爰謀法要開元十六載 御題

觀額因繇於茲廿五年上疏議齋

帝俞其請於是內

使高真自

王城而至

繪音祕旨從

天上而來諸侯肅

臨郡邑歲事革故垣棟鼎新經像彤彩翬翬金光熒熒曾是  
所營曾是有成利乎永貞太守臣裴胱并寮屬等惟 道孚

敬誼形于政奉敷休慶泉合觀徒眾等皆相與遵乃宗極體  
乎自然熙澹漠於元和朴恬愉於大順微臣嘗佐汾邑親覩  
聖蹤強名 道原用述真宰從窅冥而辯物因象罔而得

之其詞曰

三炁之宗粵<sub>玄</sub>元始朱靈丙午赤明斯起太上道君託胎洪氏後天合德其惟我李爰初啓運符命歸唐海縣攸屬六葉重光天寶是應萬壽無疆大君推策考厯元陽空<sub>玄</sub>之中自然妙有無執之衆勃勃珠口迎不見前隨不見後外物雖變我法珍久龍角嵯峨肇興靈迹仙宮乃建清都伊宅洞裏天長寰中地隔皇矣大道臨下有赫金籙祕訣玉京<sub>玄</sub>言陞壇之禮衆法之門聖祖貽訓來告孝孫於茲授命永保元元克昌身後大慶常存刊此樂石以奉至尊至尊

天寶二年歲次癸未十月景寅朔十五日庚辰下元齋建按此碑已見金石文字記及金石萃編今浮山唐時謂之

神山縣屬河東道晉州平陽郡唐書地理志神山縣本浮  
山武德二年析襄陵置東南有羊角山四年以老子祠更  
名神山山西通志山川卷內云羊角山唐武德間更名龍  
角山在浮山縣南三十五里東西二峰高峙雲表武德三  
年縣人吉善行言於羊角山下見白衣父老曰爲吾語唐  
天子吾爲老君而祖也詔以地立廟又寺觀卷內云天聖  
宮在羊角山之麓武德三年二月老子見於大樹下謂里  
民吉善行曰吾唐皇帝之遠祖也言訖不見遂詣長安奏  
聞命左親衛都督杜昂於羊角山致祭老子再見復命有  
司於其地建祠開元十四年此語誤碑作十六年御題觀額詔改慶唐觀  
御書額及碑文賜之改羊角山爲龍角山并改浮山縣爲  
神山縣此語亦誤山改龍角縣改神山皆武德四年事命高力士董修老君廟宋

天聖五年詔改觀爲天聖宮金籙齋者唐六典祠部條下  
載凡天下觀總一千六百八十七所每觀觀主一人上座  
一人監齋一人道士修行有三號其一曰法師其二曰威  
儀師其三曰律師其德高思精謂之練師而齋有七名其  
一曰金籙大齋調和陰陽消災伏害爲帝王國王延祚降  
福其二曰黃籙齋並爲一切拔度先祖其三曰明真齋其  
四曰三元齋正月十五日天官爲上元七月十五日地官  
爲中元十月十五日水官爲下元皆法貞自懺悔罪焉其  
五日八節齋其六曰塗炭齋其七日自然齋此碑蓋爲修  
金籙大齋而作頌而碑又建於十月十五日下午元齋則是  
爲國延祚設齋而建碑在三元齋期也碑爲崔明允撰史  
惟則書兩唐書俱無傳述書賦注史白廣陵人諫議大夫



善飛白子惟則陶宗儀云名浩字惟則然則碑書惟則者以字行也集古錄云唐世分隸名家者四人韓擇木蔡有鄰李潮及惟則也墨池編云惟則天寶中爲伊闕尉集賢院待制後至殿中侍御史據此碑是伊闕丞非尉也碑云於是內使高自王城而至謂高力士卽山西志所謂命高力士董修者是也碑書我法彌久作殄久猶靈應頌書殄爲溺也末云以奉至尊至尊蓋至尊應闕二格書時直下覺其誤乃複書之而上文未抹去也文中非夫至至下至字疑聖字之誤又攷道藏目錄有龍角山記一卷注唐明皇御製慶唐觀記並聖銘等記蓋皆爲龍角山慶唐觀而作所云大建闕宮明白於御碑者似卽指此此碑字極完整僅泐二字王蘭泉所錄闕二十七字當時所得裝本必

有擦損也唐以老子爲祖憑野人謠語立廟建碑至爲可  
嗤其後奉象興慶宮託於夢告又有棧道乘白衛告祿山  
將滅者皆新垣平之詐也自秦皇後世主每惑於此與梁  
武侯佛無殊未見有延祚致福者明皇好道宋徽致齋皆  
無裨於播遷之禍觀此碑所頌直是佞諛豈得與韓愈佛  
骨表並語哉碑見金石錄寶刻類編寰宇訪碑錄通志金  
石記

圓濟和尚塔銘

石高一尺三寸廣一尺九寸二十  
七行行十九字正書今在芮城縣

故和上法昌寺寺主身塔銘

并序

稱佛謂何本期於覺覺則無念乃去妄源歸法謂何本期於  
了了則達彼乃到真乘此謂度門誰能弘矣故法昌寺主圓

濟和上即其人也。派哀重華之後生緣讓畔之鄉。摠口敏聰諸法懸解。傳本寺先和上仁藻之密印承旨出家遊西京。不住相之細。徒袒肩受具。法雖示其未捨心。已湛於真。如同須菩提第一解空。終優波離不忘持律。十餘霜露杖錫歸來。充本寺律師。尤高精義。口口徒眾抑進經維。和上違之。恐住著口貽就口。恐福養受損。乃日捨粟麥十萬圭。用補常住。因知僧口豈怠功勤。智慧無涯。倉儲益贍。心符妙用。故不滯往來迹。混有為故。不勵崇樹於本寺。為過往和上建功德塔一十一級。在身心為砂界。舍生持蓮花淨品。日餘一遍。凡冊載隨因證果。出有入無。千里口緣從師者如市。一門釋子落髮者數十人。和上夏五十九壽八十一。以天寶二載癸未歲冬十二月。遘疾忽於夜日。吾此室內朗明如雪。此非非。

相吾將逝焉至廿八日泊如長逝弟子法燈等號慟靡及安神於寺西北一里護持喪事者繼踵贈賻助哀者傾城龍爲咽而雲悲厲詩懷而兩泣身塔創起琬琰未刊僕此邑西人脩聞厥事慙越境而訪拙課鄙遠以成銘其雄狀龍鱗疊級玉鐐半插雲漢常對虛空此則萬掌合而攸歸千目迴而志仰余不紀矣獨舉德焉偈曰

我師深入度門玄密藏宵默誰窺焉今解形以示滅吾不知夫所以然

進士韓詮撰

進士董光朝書

趙嶠鐫

校通志金石記碑標題故和上法昌寺寺主身塔銘戈青侯履徵所得者石嵌寺殿後壁爲鐘懸所隱艱於施墨故

自來未見著錄和尚僧臘八十一以天寶二載十二月二十八日示寂文末言刊石年月蓋已在三年矣撰書之韓詮董光朝並署進士書頗秀潤文標題爲銘而末乃用彼法作偈曰唐塔銘類然不止此碑今芮城縣志無唐法昌寺可据此碑補韓詮董光朝通志貢舉諸門均闕亦宜補列碑見通志金石記

權徹琵琶泓詩

碑高一尺六寸廣二尺七寸二十二行行  
字不一字徑七分行書左行今在鳳臺縣

琵琶泓作并序

予頃嘗秉憲負譴而還才散

數奇屢移邦國爰初至心即

聞有茲勝迨今一遊果觀殊絕

澄灣納溜激射成雷峭壁迴  
景周流如畫嘉木潛鱗又不  
可名也北去七里復有石潭焉  
潭中有聖字了了可覩峰巒  
相屬宛似屏障閒行其中潛  
洞幽邃信爲靈異予超然有  
獨往之意而賦是詩

咨予白髮年始佐丹水曲風顛解塵組  
幸茲洗煩欲琵琶翠泓湛且清屏

風畫壁勢相適榿栢颺颺雜風雨龜

龍賜睽游虛明北行七里有靈跡潭中

聖字看歷歷一符 君德應

明時一契吾真指幽適出來此泓□□

傳今夕觀之位可憐夷猶頓使宜清

薄日暮濯纓心浩然

天寶五載夏五月廿一日朝請大

夫守高平郡別駕權澈詞

前錢唐縣尉瑯琊王紆書

右琵琶泓詩朝請大夫高平郡別駕權澈詞錢唐縣尉瑯  
琊王紆書澈名不見於唐史考文苑英華有獨孤及撰高  
平別駕權幼明碑卽其人也澈字从水獨孤集本从彳乃  
偏旁之譌英華刊本作允則誤之甚矣獨孤碑云開元二  
十三年拜監察御史會監察太廟先時同事者約相與偕  
赴及將赴祭約者有故不至遽不暇告公曰人約我矣豈

可先已而後信乎遂不赴坐是降爲河南府法曹由新安  
令爲絳郡司馬高平郡別駕故其文有乘憲負譴來佐丹  
曲之語也鳳臺縣志王紆郡人瑯琊王氏之望族琵琶泓  
一統志洞子岩在鳳臺縣東十五里下有聖字泓卽琵琶  
泓詩序云水中聖字了了可見者卽碑見通志金石記孫氏訪  
碑錄

### 董昭墓志

碑連額高二尺一寸廣二尺一寸五分二十九行行三十  
六字正書碑蓋題唐故隴西郡董君之誌九字篆書今在  
縣南城

大唐故宣威將軍守右武衛中郎將隴西董君墓誌銘

并序

公諱昭字夏慶隴西狄道人也先業從宦徙居陝西靈寶焉  
迎德布於方策門風傳乎奕代狐稱良史永彰孝行安于啓



於趙祚仲舒光於漢才人物衣冠可略言矣曾祖領府君大父操府君列考難府君皆高尚其志泚慎其身蠶織蕨諸不求善價良弓必復其大後昆公即府君之元子也傑出高標閒生特達幼而才敏鳳鳴有五色之姿長則心冠鴈鵠揚万里之望屬蠻夷猾夏憲乾九重公則魏絳和戎功多五利有詔特拜慈州司馬朝散大夫充太倉出納使青雲自致朱紱斯皇雖題與外臺而楚才晉用轉隕州長史餘並如故位因能進政以清聞尋除秦州司馬充隴右軍器使又徙長史使仍舊應 天地之洪鑪鑄劍戟為農器利有轉置軍其繁賴時天水地震陵遷為谷城復于隍公謀去故絳制造新邑不怨于素用追我凶徽君則人其魚乎時議知政有經矣既而遷宕州刺史祿有功褒有德也安人阜俗則黃霸徒言名

遂功成乃祁奚請老 震旒順其至懇解印返於初服與相  
國牛公有管鮑之分欽服厥義常以兄事公公必告善道投  
膠契於三益莫附權勢挂冠追於二疏北面辭 闕而不留  
東歸拂衣以遐逝長卿入郡駟馬生風買臣還鄉錦衣照地  
公暮齒益辯所至必聞復徵拜右武衛中郎將仍充太倉使  
潘岳偉才直于散騎之省汲黯能政利往海陵之倉公遺愛  
尚存舊貫未改在脂膏之地惟德潤身當熈疑之衝裒多益  
宜君子以為難矣公以道濟時處進知退 君命至則不矯  
抗辭耄年侵則不苟縻祿復請致仕再懸舊車子惠琳和政  
郡別駕遺榮展驥返哺瞻烏令伯陳情叅乎就養寒林抽笋  
正奉於庭闈靜樹驚風忽摧於梁木以天寶五載九月十八  
日寢疾薨于鎬京城西甘泉里之私第春秋八十二崑山之

玉與石俱焚龍門之桐捐雲半死朝廷聞而傷慟者豈勝言哉夫人南陽郡君張氏金鈎表祚石笄旌賢柔順貞明宴息禪慧蓮華照水豈方清淨之心薤露晞陽將生極樂之界以開元廿三載二月四日跌坐歸真于同谷郡之別業春秋七十二開元廿七載十月十四日歸拏故鄉以形建塔天寶六載二月十四日以公之喪至自秦會葬于中條之南原禮也前臨河潯水閤成川却背山陽舟遷去壑龍泉之劍雄雌始異於飛沉馬騮之墳佳城竟歸於同穴嗣子惠琬咸安郡良山縣令次子惠琳等哀苦茹荼痛思吹竦號天泣血申諭道之無從刻石幽泉庶立言而不朽銘曰

蜀地開國神降安于炎漢晉士方生仲舒象賢必復一杖題輿五遷杖節二請懸車高門駟馬照乘雙珠論道叅養過庭

鯉超散金正樂埋玉何辜哀哀內則淋德敷聞鳳凰琴瑟桂  
郁蘭芬溘然大暮薨我小君一朝同穴千歲孤墳河山帶礪  
不朽斯文

按志云公諱昭字夏慶隴西狄道人先葉從宦徙居陝西  
靈寶唐書宰相世系表漢江都相仲舒少子之孫自廣川  
徙隴西此隴西有董氏之始君蓋其後也按志公自慈州  
司馬充太倉出納使轉隰州長史除秦州司馬充隴右軍  
器使又徙長史其云天水地震陵遷爲谷者舊唐書五行  
志開元廿二年二月十八日秦州地震壞廨宇及居人廬舍  
數千間地拆而復合震經時不定壓死百餘人元宗令右  
丞相蕭嵩致祭山川又遣倉部員外郎韋伯陽往宣慰存  
恤所損之家然則董昭以是年爲秦州長史以碑公謀去

故絳制造新邑考之則必有改建城邑之事史無可据碑

補又言公遷宕州刺史解印返於初服是先由宕刺致仕

其曰與相國牛公有管鮑之分者此必牛仙客之友通鑑

蕭嵩在河西委軍政於仙客仙客廉勤善於其職竟代嵩

爲節度使宰相表開元二十四年十一月壬寅朔方節度

使牛仙客守工部尙書同中書門下三品

唐制中書令侍中爲正宰相大

歷前侍中中書令正三品此同中書門下三品者卽同中書令侍中也

天寶元年七月辛丑

仙客薨開元天寶宰相牛姓惟仙客故知此碑相國牛公

卽仙客也志後云復徵拜右武衛中郎將仍充太倉使復

請致仕以天寶五載九月十八日薨綜觀志文董君始爲

隴右軍器使仙客爲河西判官河隴同官相得故稱管鮑

之交仙客旣相請致仕

以志莫附權勢挂冠追於二疏文知之

其復起必仙

客薦之仙客薨仍致仕也

仙客薨天寶元年蕭君薨天寶五載其再致仕必在仙客薨後

其子惠琳和政郡別駕惠琬咸安郡良山縣令碑立天寶

六載在改州爲郡之後故皆稱郡而不稱州文亦清麗縝

密饒有器韻雖不及王修福碑而勝屯留諸墓志遠矣芮

城續志有此碑

### 梁二娘造像記

座高二寸廣四寸側厚三寸正面七行右側二行行均四字至五字不等正書像高一尺今在終州衙署

佛弟子梁二娘類身康念敬造救苦觀世音菩薩一區

天寶六載五月五日造成一心供養

此刻見金石記

### 何知猛墓志

石高廣皆一尺五寸六分二十一行行十二字正書末題行書三行今在永甯州

大唐故□□墓誌銘

悲訣鼎族輩聲肇自三皇之季宗派<sub>①</sub>爰生五帝之初奔  
葉雄傑連枝懿戚播徽猷於簡策讚盛德於筭謨望重赴於  
西河榮宗光於上國君諱知猛字元須因官啓族徙昌  
化郡焉曾祖令輿隋任脩化縣令製錦一口絃誦百里

祖開文上柱國銳略三軍神謀七札

父知猛騎都

尉惟公珎磨道德組織仁義穆穆恭順色養不闕於晨昏

察察其能忠貞無乖於奉國何曷朱明落彩素月淪輝嬰疾  
晨宵沉痾累寢名醫不愈良藥無痊忽遭風霜梁木斯折嗚  
呼哀哉以天寶三載十二月廿八日春秋六十有八終於私  
第夫人太原王氏惟夫人母儀式序貞媛自天六行早譽於  
閨闈四德夙彰於閨闈不謂春□□美忽遭秋霜降靈魄於

仙宮空花容於窈窕以天  
**七載**五月二十七日春秋六十  
終于私第嗣子哀之以風樹孝禮未申悲之以逝川懷恩罔  
極嗟乎生何以禮恭順以事之死何以贈棺槨以葬之以天  
寶七載歲次戊子五月庚午朔二十七日景申謹墓於郡城  
北二里之原禮也其地則青山面合翠樹臨墳東西感應於  
禎祥南北並符於吉地不封不樹何以表其孝乎剏剏豐石  
通為銘粵

猗歟望族器局神才有而忽往無而忽來哀風鬱悵悲雲徘徊  
側身辭口日魂歸夜臺

其一

余素好金石來任永甯此誌適出物聚所好信然道光二  
十三年七月王繼賢識

山西通志何君名知猛字元須而文敘其世家云曾祖令



輒隋任修化令祖開文上柱國父知猛騎都尉父子同名  
必書人之謨文首悲夫作悲誄銘曰作銘粵曰粵二字古  
通誄則罕見也石於道光二十三年出土有知州王繼賢  
題記今搨本漫漶據通志爲何君碑云因官啟族徙昌化  
郡居焉唐書地理志天寶元年石州改昌化郡乾元元年  
復故碑立於天寶七載故稱昌化郡舊職官志勳十二轉  
爲上柱國比正二品五轉爲騎都尉比從五品又勳官者  
出於周齊交戰之原本以酬戰士唐會要勳官上柱國已  
下至武騎尉爲十二等有戰功者各隨高下以授今知猛  
祖父志列勳而不及職與隋此必戰士立功而未更事任  
者家世武闕故書碑有父子同名之誤又碑云天寶七載五月庚午朔二十  
七日景申唐世祖名丙唐人諱丙爲景故曰景申碑見

字訪碑錄補

牟尼彌隨讚

碑高一尺八寸廣二尺陽面石十二行行十五字碑陰分兩  
數上載佛龕下載多心經十五行行十六字側厚三寸題  
名二行首行十二字次行八字  
正書今在梓州張鵠舉學博家  
釋迦牟尼佛阿彌陀佛等讚 并序

原夫釋教幽深法門冲寂不生不滅實大聖之真誠如幻如  
泡若凡愚之虛口或演三千於世界至理煥然或口口口於  
祇園口菓交映有斐君子善哉口口捨無用之資財成有為  
之功德聯聯口眼池蓮比而不華皎皎朱脣園菓口口無色  
以此成就無讚揚寤寐之間回為頌曰

道門闡兮無不遵知苦海兮有沉淪念茲人兮能歸真捨口  
為兮成法身願祇園兮菓樹春千萬載兮日彌新

山志卷之七  
天寶十一載七月十五日記

碑陰

南无藥師瑠璃光佛

波羅蜜多心經

語未錄

左側

佛弟子左監門直長高子珍書

母郝

妻張

男望

言妻不口

按碑末書天寶十一載七月十五日記佛弟子左監門直長高子珍書新唐書百官志左右監門衛掌諸門禁衛及門籍注監門校尉三百二十人直長六百八十人以子珍題考之則左監門衛直長也與新志合碑見通志金石記楊口仙造陀羅尼經幢

幢高二尺五寸廣四尺六寸八面刻先經後  
記六行行字不一字徑六分正書今在鳳臺  
陀羅尼經七面正書不錄

大唐天寶十有二載歲次癸巳七月朔庚子十五日甲寅

□□□□楊□仙奉

神武應道皇帝建立寶幢 皇帝廣□

□□告成 天寶七載五月十三日大敬君

□叶慶惟新上報 聖慈隨 時□□

此楊 關 仙造經幢經七面記止一面寥寥數語磨泐尤多

因天寶年物存之

智通禪師塔銘

石高一尺六寸二分廣二尺三寸四分二十七行行  
十八字至二十三字不等行書今在永濟縣棲巖寺

大唐栖巖寺故大禪師塔銘

龍興寺主沙門復珪撰

惟佛有覺海酌其流者為得一佛有慧日赫其照者為至道  
夫能航逝川適寶所者吾師矣師諱智通姓張氏虞鄉七級  
人也童年有濟世之量請益於大智尊者晚節當付屬之重  
善誘我堯之封人 天與（省）和聲振開輔粉蕙德行澄滅使  
流降心魔嚴道品砥操勵能終朝獨王前刺史裴寬以師繼  
然一燈請傳覺印後太守韓朝宗以師道高五眾請師為僧  
寶非隨侯明月難授有卞氏連城增價不其然乎於是雲峯  
之下軒冕如川巖花之前摠衣成市除沙鹵之株杌甘露清  
田酌肥膩之菁華醴酬灌頂行有餘力綴已惠人綆汲群蒙  
衣珠密繫使夫股肱之人一變至于道者十八九焉嗚呼世  
界無常生靈起滅將示絕絃之迹俄增還奪之痛翌日不救

藏舟夜半以天寶十載十一月廿七日終於住寺春秋六十  
有九為厭毒而歸休耶為傳薪而火成耶生生之與化化其  
可左右門人有奢花之痛道俗懷苦海之憂寺主令賓師之  
同志恨寶渚無梁衢樽莫挹鶚林墜月狂鳥易奔與弟子惠  
照饒益寺上座崇道等異佛影之猶存以封灰而建塔俾傳  
能事授手於子復珪辱在緇門豈忘提拙銘曰

開示佛乘住無所住傳衣佛國去無所去拯洽回流梯航六  
度誰其悟入我師調御

其一

行佛能事事果而往水竭龍移

山空翻響灰封殯塔珠沈帝網留影維峯提河列像

其二 廢

泣之痛潸然灑地蘭若空虛緇林殄悴閱水藏舟藤坐及隧

豈惟羊枯方稱墮淚

其三

天寶十三載甲午歲六月三日寺之創新鍾之晨建

造塔大匠京地王光

河東張伽刻字

按碑題龍興寺主沙門復珪撰永濟縣志棲巖寺在縣東南二十五里中條山上北周建德中建初名靈居後改焉唐時名士多游於此盧綸李益李端並有詩傳於人間爲河中諸寺勝賞之最通志金石記碑久陷土中光緒庚寅經朝邑閭相國訪得始爲掘出禪師姓張氏虞鄉人行書絕佳而碑無書人姓名

以上錄原文

碑云師諱智通前刺史裴

寬請傳覺印後太守韓朝宗請師爲僧按二人刺蒲皆在開元末舊唐書裴寬附裴淮傳開元二十一年冬裴耀卿扈從出關奏寬爲戶部侍郎遷吏部侍郎元宗還京改蒲州刺史州境久旱入境雨乃大此開元二十二年寬刺蒲之證新唐書韓朝宗傳初惡左拾遺累遷荊州長史開

元二十二年置采訪使朝宗以襄州刺史兼山南東道貶  
洪州刺史天寶初爲京兆尹不言爲蒲刺王維前京兆尹  
韓公朝宗墓志貶洪州都督遷蒲州刺史黜陟使奏課第  
一徵爲京兆尹舊唐書元宗紀天寶元年有京兆尹韓朝  
宗此開元二十八九年朝宗爲蒲刺之證唐武德改隋太  
守爲刺史天寶又改刺史爲太守故碑文以刺史太守通  
稱

思道禪師墓志

石高一尺五寸八分廣一尺五寸十七行行二十三  
字至二十五字不等行書今在夏縣寺後村威神寺  
威神寺故大德禪師墓誌

和上俗姓師諱思道絳州夏縣平原人也天縱其志七歲出  
家人推其聰十八剃髮事人不事爲人不爲同鵲巢于頂之



年護浮囊無缺之日次就有德轉相師師禪行法門戒律經  
論耳目聞見紀之心胷緇錫來求簪裾欽仰聽習者鶴林若  
市頂謁者鹿苑如雲去至德二載春秋八十有一僧夏六十  
一時催二鼠妖纏十夢其年十二月示身有疾隨爲衆生其  
月二日禪河流竭坐般涅槃衆驚慟知聞悲羣飛走孫威神寺  
主僧承嗣五內摧裂踴躍攀號聲竭潛哀淚盡續血至乾元  
元年十二月二日遷於條山之側胄子塏頭禮也詢問其地  
取人不爭砥柱東橫汾河西樹青臺鎮北鹽池臨南岸爾塏  
頭卜擇安厝雖則天長地久而恐代異時移陵谷改遷斯文  
不謬其詞曰

繡門積疊 寶樹南摧 法消蓮坐 魂滋夜臺 條山陰  
麓 巋然塏頭 碧巖引吹 清澗遶流 和上登兮舊賞

功匠興兮今脩 建崇塔兮數仞 陸金骨兮千秋

按此碑金石萃編已著錄碑云絳州夏縣平原人唐書地理志夏縣本隸虞州貞觀十七年隸絳州大足元年屬陝州尋還隸絳州乾元三年復屬陝州碑刻於乾元元年其時夏縣尙屬絳州也平原者地理志絳州絳郡注云有府三十三其一曰平原碑又云遷於條山之側條山卽中條山也在虞州解縣元和郡縣志山在解縣南二十里縣東十里有鹽池碑又云鹽池臨南者是也碑又云胄子埏頭按爾雅釋水注呼水口沙堆爲埏釋文堆作埏水經河水注風陵戴延之所謂風埏大約水中沙湧之地故曰詢問其地取人不爭也碑在今夏縣石質堅緻字畫完整無斷泐筆法類李北海在小唐碑中足稱妙品矣鹿苑見釋法

顯佛國記苑在迦尸國波羅捺城世尊成道處宋書謝靈運傳欽鹿野之華苑碑作鹿苑苑古通二鼠卽二豎十夢見因果經毗婆沙論有十纏般涅槃譯言滅度見隋書經籍志碑見通志金石記

柳真召墓志

石高廣皆一尺十四行行十九字  
至二十二字不等正書今在忻州

唐故朝議郎忻州司馬柳君墓誌銘 并序

君諱□召字真召其先河東人也 曾祖慈□□銀青光□  
大夫貝州刺史 祖仁秀唐朝散大夫陸州司馬父愨朝請  
大夫辰州都督丕讚昭業皇周之襲恤錫羨推賢迭遷公  
甫年弱冠孝廉擢第贈文藻輻策略屬時寇虐特為使司委  
焉不移良佐復兼防禦副使運良籌整師旅故能卒乘輯睦

少長有禮豈其彼蒼不憖俄然寢疾以軋元二年十二月廿三日終於公館春秋六十有五以其月廿九日權殯於州城西南三里九原崗禮也嗣子銛次子湏次子汚孺子淑殮荼茹苦泣血崩心痛厚地而無追戀終天而永訣嗚呼哀哉其詞曰

蘭芬而摧玉美亦析嗟乎彼蒼喪此賢慙

其一

□□高道人稱遺愛恨東逝而長歸泣西傾而不再

其二

校司馬北魏柳蚪之裔新唐書宰相世系表魏尙書右丞僧習子後周中書侍郎美陽縣公虬生蔡年後周順州刺史蔡年生謩之隋黃門侍郎謩之生慈明職方郎中卽志之曾祖志稱貝州刺史舉其終官此下表闕一世卽志之祖睦州司馬仁秀表再下一格有愨辰州都督卽志之父

則官與名悉合於志司馬與其子表皆闕如據志司馬嗣子銛次湏次沔又有孺子淑皆當據以補表表愍下兩格有名立者必司馬孫志云司馬甫年弱冠孝廉擢第唐會要貞觀十八年二月六日引汴鄆諸州所舉孝廉賜坐於御前寶應二年敕孝廉進士並行建中元年六月九日敕孝廉科宜停司馬卒於肅宗乾元二年年六十五上距弱冠之歲實先天開元間距德宗建中停孝廉歲尙先六十餘年故得以孝廉第志又曰屬時寇虐使司委焉不移良佐復兼防禦副使按寇虐謂安祿山之亂新方鎮表河東節度領忻州唐人詩文使司使家皆准節度觀察兩使而言非謂刺史祿山亂後以舊唐書本紀通鑑新唐書李光弼傳考之天寶十五載正二月河東節度爲李光弼三月

至七月爲王承業八月至乾元二年六月復爲李光弼是  
年七月至上元元年五月爲王思禮司馬卒乾元元年十  
二月正思禮節度時使司委焉者謂爲承業光弼思禮所  
委也新百官志安祿山犯順大郡要地宿賊衝者置防禦  
使代宗卽位廢大率防禦使皆兼所治州刺史又防禦使  
副使各一人新逆臣傳祿山反范陽使高秀嚴守大同通  
鑑至德二載正月秀嚴自大同圍太原按唐大同軍數徙  
秀嚴所守者唐會要新地理志朔州馬邑之大同軍自馬  
邑南犯太原則忻代當賊衝故置防禦使刺史充使司馬  
以上佐充副使唐防禦使皆見新方鎮表忻州不見者代  
宗停志文運良籌整師旅諸語雖諛墓恆詞然證之諸書  
至德二載高秀嚴犯太原後迄於歸降無再犯太原事亦

其證也又職官志銀青光祿大夫從三品文散官貝州地理

志望刺史從三品朝散大夫文散官睦州上州司馬從五品

辰州中都督府都督正三品職方郎中從五品貝州刺史從三

州望州非累經還轉不得通志金石記朝議郎正六品上

故謂志稱慈明貝州刺史係舉其終官

文散官忻州下州司馬從六品下散品高職事卑故為行志

### 李公墓志銘

碑高一尺九寸五分廣一尺九寸二十一  
行行二十六字字徑五分正書在臨汾縣

唐故金紫光祿大夫試太子詹事兼晉州刺史上柱國隴西

郡開國公李公墓誌銘 并序

山有發地崛超者謂之靈岳木有梢雲挺權者謂之長材然  
木之秀也遇驚風或折山之峻也有朽壤則崩墮以人事擬

其倫我李公近之矣公諱良金隴西人也五代祖儉佐

高皇帝定都於雍因居幽郊子孫不遷遂傳家于新平矣皇

祖素<sup>寧</sup>州真<sup>寧</sup>宰大父享絳州長社府<sup>口</sup>衝列考宗益州新

繁令或墨綬馳聲戎馬冠陳力皆樹德積善而鍾美於公公

即新繁府君之次子也幼而銳敏長而英奇氣鬱風雲心堅

鐵石弱冠忽投筆太息杖劍獨遊時朔方節度副使論公遇

公而寘之幕下<sup>口</sup>後出奇破敵數難計功廿年間累有遷拜

日者受今符之寄於晉也人樂其化吏畏其威雖迫兇徒而

身處唐郊亦懷王命而心馳魏闕間歲職營田之

務於痛也規畫疆理巡閱耕耘法立令行人莫敢犯豈意訟

因小史詞忤大臣蒼黃之際命婦不測傷哉以大<sup>曆</sup>三年七

月十一日奄終於河中府春秋卅有七夫人榮陽鄭氏芳蘭



之姿堅冰之操中年不幸先公而亡以廣德元年十一月十四日返□於晉州官舍享年卅有一旋以公即世之歲十一月廿六日合葬於晉城東偏龜筮叶從也嗣子季平弱而在疾哀不絕聲長號終天願言報德銘曰

長材

國楨雅望人傑植性剛毅守官忠烈□□□□

□□心苦卽泔晉作牧吏畏人悅如何生涯忽焉冥□□□  
□□秀木析繁霜凝芳蘭歌□千秋芳□□□□□  
□雙魂兮同苑□□□□

此晉州刺史李良金墓志道光丙午三月平陽東關新寺  
濬池得之石失一角銘闕廿二字餘俱完好李公官晉州  
刺史有惠政因涉訟而不得其死亦不詳何事朔方節度  
副使卽論惟貞史不詳其爲朔方節度副使長社府唐志

隸絳州與志合碑見續語堂碑錄通志金石記

贈太保李良臣墓碑

碑高一丈一尺三寸二分廣四尺三寸二分二十五行行六十六字正書今在榆次縣趙村

唐故開府儀同三司鷄田州刺史御史中丞贈太保李公墓碑

朝請大夫守禮部侍郎上柱國李宗閔撰

儒林郎試果州司馬騎都尉楊正書

庚子歲

嗣天子既即位乃訪於百執事曰

先皇帝平定海內□興我唐惟二三臣功孰為大僉曰邠帥司空光顏其尤者也始戰于□又戰于蜀大戰于蔡終功于齊皆著嘉庸實為上將

天

子乃召至京師禮之於廷□為宰相錫甲第內宴以遣之曰

姑復而所異日有事吾與公圖之居一年燕趙繼亂

天子詔公以許昌精兵渡河北討未戰而軍罷留鎮于許昌又數月□□軍反逐其帥立其次將芥以請

天子聞之怒又詔公以全軍征之公既拜

勅□以麾下万人晝夜兼行一戰而摧其鋒□傳于城下賊衆惶駭斬芥首以獻汴宋平

朝廷冊功

拜公司徒兼侍中師還大饗勞於是百城之長與三軍之吏皆入賀讚詠功德公泣且曰此乃

天子神

靈賢士大夫之力光顏何有也然光顏曾王父始自北土□于天朝廿愬部兵為國保障

先公太保功

烈尤多而皆從事諸侯止於裨將儲□□社集光顏弟兄今先人盛德不彰而光顏專享其報光顏之罪也何敢言

功其軍司馬武功蘇遇起而言曰公位冠羣后勲在王府明  
著先公之美於後世於□□可宜得宏達博雅之士以  
文之乃久而益傳遂使使請銘於禮部侍郎宗閔宗閔承  
命惟恐辭不敢當伏念數日以為百吏於宰相皆寮屬也又  
何敢讓□視切行狀□□其語曰太保諱良臣其先  
黃帝之子曰昌意封於弱水之北因其夷狄而王之其後子  
孫世世為大人号阿跌部遂以為氏至太保王父諱賀之雄  
武而多大略諸□□長爭歸之常思因事立功以顯名中夏  
當此時

唐初受命

太宗

文皇帝已即大位公遂率其所統南詣靈武請為內臣

太宗召見與語奇其才能拜為銀青光祿大夫

鷄田州刺史充定塞軍使賜車服器用以寵之命築城邑以

居始有宮廟官屬之制而族部滋益大矣□西戎北虜之間  
□□聲牟皇考諱延豐嗣立襲鷄田州刺史以功加開府  
儀同三司太常□上柱國卒贈工部尚書太保素以寬厚勇  
敢為部下推伏既襲位每謂其將校曰自吾祖□國□

唐厚恩願憑諸君期以上報未幾安祿山用幽燕勁  
卒□濟河陷洛而峭函不守

⑤宗幸巴蜀

肅宗幸靈武公聞之慟哭□□□日吾平生志業常已布於諸君今 王室多故是吾死節之日諸  
君能從我乎眾皆感激許諾乃馳詣 行在

肅宗□之委以腹心

王師收兩京平劇

賊公之功居多拜開府儀同三司鷄田州刺史充朔方先鋒  
左□兵馬使事太尉汾陽王汾陽王愛公沉默多斷軍中之

事一□咨公尋遷御史中丞別職如故以寶應二年七月廿三日薨於河中□所享年卅有六以貞元十一年八月葬于太原府城東卅里孝敬原太保少為阿史鄰可汗所重以其□女妻之實生三子長曰光玘為朔方都將不幸早夭次曰光進朔方節度使刑部尚書薨贈左僕射少則 司徒元和

中 憲宗章武皇帝以僕射 司徒□在弟一賜姓李氏屬藉于宗正追命公為太保夫人史氏為燕國太夫人銘曰

太保之先蓋出軒轅奄有北狄世為大人綿綿千載以至光祿雄材多斷率衆內屬是時

□帝初有天下實命光祿定居朔野錫之城邑車服旌旗北制獫狁西當昆夷尚書承業克有威令統部益繁兵車尤盛

是生太保兩有忠孝摺酬國恩以承祖教燕盜南叛

肅宗西巡傾河洛遂援三秦公聞慟哭

悉率騎士馳詣

行在請先致死

帝

用嘉歎俾雜禁旅夙夜勤勞在

帝□所

帝收京闕因定兩河推鋒陷陣公實居多□

□□□□□位品秩威儀俾同三事雖受嘉命未登大臣

不□其德乃相後人傑射繼武勇如羆虎□□桓桓殿茲西

土 司徒特盛為國上公人持相印出錫彤弓□□□□□

□□□□□□□□□□

帝嘉元侯追

命

祖考既寵尚書遂尊□□推功建德賜姓命氏

藉于公族同我宗子存歿之榮古今孰比

按碑題廟請大夫守禮部侍郎李宗閔撰儒林郎試果州

司馬楊正書金石錄一千七百五十六唐贈太保李良臣  
碑李宗閔撰楊正正書今搨本相同舊唐書李宗閔傳穆  
宗卽位拜中書舍人長慶元年貶劍州刺史復入爲中書  
舍人三年冬權知禮部侍郎四年貢舉事畢權知兵部侍  
郎碑言庚子歲嗣天子旣卽位乃訪於百執事曰先皇帝  
平定海內關興我唐惟二三臣功孰爲大僉曰邠帥司空  
光顏其尤者也舊唐書穆宗紀十五年正月庚子憲宗崩  
丙午卽皇帝位六月庚辰加邠甯慶節度使李光顏特進  
九月庚子召李愬李光顏入朝戊午以邠甯節度使檢校  
司空邠州刺史上柱國武威郡開國公李光顏同平章事  
與碑司空碑云始戰于關又戰于蜀大戰于蔡終功于齊  
天子乃召至京師禮之延爲宰相錫甲第內宴遣之舊書



光顏傳從河東軍爲裨將討李懷光楊惠琳皆有功後隨高崇文平蜀元和九年討淮蔡九月遷陳州刺史踰月遷忠武節度使會討吳元濟詔以本軍獨當一面明年五月破元濟之師于時曲十一月破小澗河柵十一年拔凌雲柵十二年四月敗元濟之眾於鄆城賊知光顏勇冠諸將乃悉其眾出當光顏之師時李愬乘其無備襲蔡州拔之董重質棄洞曲軍入城降愬光顏知之入賊營萬餘人皆降賊平加檢校司空碑所謂大戰于蔡也按碑始戰于下有闕文以傳考之指憲宗朝討楊惠琳事當作始戰于夏

楊惠琳以夏州叛

蜀謂劉闢齊謂李師道

光顏平李師道皆見傳

傳云詔赴

闕賜開化里第進加同中書門下平章事穆宗以光顏功冠諸將故召赴闕譙賜優給已而帶平章復鎮所以報勳

臣也

本紀元和十五年九月己酉  
宴李光顏李愬於麟德殿

與碑所述略合穆宗紀

長慶元年十二月戊寅鳳翔李光顏爲忠武節度使舊傳  
元和十三年授義成十四年移授邠甯長慶初遷鳳翔歲  
末復授許州節度卽忠武朝廷將討鎮冀故有此拜二年  
命光顏兼深州行營節度使祈還鎮碑所云天子詔公以  
許昌精兵渡河北討未戰而軍罷留鎮許昌卽其事也舊  
紀長慶三年七月戊戌汴州軍亂立牙將李齊爲留後八  
月己未詔陳許李光顏收汴州丙子斬李齊卽碑所云汴  
宋平也舊傳遷河東節度正衙受冊拜司徒兼侍中舊紀  
長慶  
四年六月陳許  
李光顏守司徒亦與碑拜司徒兼侍中合碑以從軍司馬  
武功蘇遇之請而立碑云太保諱良臣其先封於弱水之  
北阿跌部王父賀之雄武多大略常思因事立功唐初受

命文皇卽位公遂率其所統南詣靈武太宗召見拜銀青光祿大夫雞田州刺史充定塞軍使命築城邑以居新唐書回紇傳突厥已亡惟回紇與薛延陀爲最雄彊其酋攻薛延陀殘之并有其地遂南踰賀蘭山境諸河遣使獻款太宗爲幸靈州靈武郡次涇陽受其功於是鐵勒十一部皆來言願歸命天子請置唐官有詔張飲高會引見渠長等以唐官官之明年復入朝以阿跌爲雞田州酋領爲刺史置燕然都護府統之給元金魚符黃金爲文作絳黃瑞寶刀錦文袍賜之史不著雞田刺史名以碑證之卽賀之也碑云考說延豐襲雞田州刺史卒贈工部尙書太保襲位未幾安祿山用幽燕勁卒濟河陷洛嵒而不守肅宗幸靈武公馳詣行在王師收兩京公之功居多拜開府儀同三

司雞田州刺史充朔方先鋒兵馬使事太尉汾陽王尋遷  
御史中丞別職如故寶應二年七月二十三日薨于河中  
通鑑寶應元年建卯月辛未中書令郭子儀知朔方河中  
北庭潞澤行營兼興平定國等軍副元帥七月己卯子儀  
自河中來朝八月己巳留京師此云寶應二年七月二十  
三日薨疑當作元年寶應二年卽廣德元年

舊紀寶應二年六月癸未

河中節度使王昂  
檢校刑部尚書

以舊紀考之廣德元年鎮河中者王昂

非郭子儀又是年七月壬寅朔壬子改元廣德是日以後  
卽爲廣德元年寶應二年七月不得有二十三日疑碑本  
有誤李良臣爲光進光顏之父本姓阿跌氏光進元和八  
年賜姓李氏此稱李公是由光進光顏而追稱之也碑見  
金石錄補潛研堂金石跋尾金石萃編通志金石記

王守忠經幢

幢高一尺三寸七分七面各廣三寸八分七行  
行三十一字至二十九字不等今在聞喜縣

佛頂尊勝陀羅尼經經文不錄

永泰元年十二月□□朔□□守聞喜縣令王守忠敬造  
按此石見通志金石記聞喜縣志補

鐵元始讚

石高二尺四寸廣三尺五寸前刻鐵元始讚後刻承天軍  
城記並行書讚序八行行三十一字至三十四字不等今  
在平定州東北九十里  
娘子關坡底老君洞

鐵元始讚并序

潛聖道士胡伯成

道者一氣元二儀始竊兮無為之理其形也從本降迹拯拔  
生靈則有玄都 聖容焉天尊仙衛焉有若 河東郎度

兵馬使開府儀同三司張公英果絕倫宏略冠代志清國  
難戍此累霜初則環山作城班翰望之息計終乃弘道佐

主有苗於焉來格遂銳精足巧範鐵庄金煙霏霞裳鏡  
寫河目仙聖之臣斯覩無俟射山肆覲之禮獲申不殊台嶺  
則知公之守則固戰常剋皆慈衛之力也雖勿受福人神  
其捨諸成忝玄門墨卿敢忘讚述銘曰

大羅虛皇号元始陶冶乾坤度生死張公範金列于此  
保國寧家千萬祀

金石續編此讚道士胡伯成爲河東節度兵馬使張奉璋  
所作平定州志失載金石家亦未錄也按碑言環山築城  
者卽指奉璋築承天軍事張奉璋新舊唐書無傳舊書王  
縉傳河東節度辛雲京卒遂兼太原尹北都留守河東節

度營田觀察等使太原舊將王無縱張奉璋等恃功且以  
縉儒者易之每事多違約束縉一朝悉召斬之將校殷栗  
舊書代宗紀大厯三年八月庚午王縉兼河東節度使碑  
刻於大厯元年奉璋死於縉節度河東時當在大厯三年  
後今通志金石記卷四有承天寨記卷十有元始讚並承  
天軍城記其實卽一碑讚文稱張公英果絕倫云云雖獻  
諛恆詞然以王縉傳奉璋恃其有功句考之則奉璋固於  
河東非無勳伐者按通鑑至德元載二月光弼遣裨將張  
奉璋以兵五百戍石邑石邑在井陘蔡希德引兵攻石邑張奉  
璋拒卻之二載正月史思明攻太原思明使人取攻具於  
山東以胡兵三千衛送至廣陽別將慕容溢張奉璋邀擊  
盡殺之奉璋之功卓卓可紀至王縉殺奉璋則用光弼入

王承業軍斬崔眾將郭子儀軍斬張用濟之故智以立威耳未足爲奉璋罪也伯成題潛邱道士卽太原人碑見金石錄補金石續編通志金石記

承天軍城記

高廣詳鐵元始讀此刻讀後行書三十四行行三十字至三十三字不等石闕下方右角今在平定州

承天軍城記

道士胡伯成

易稱設險詩曰干城蓋陳述公侯蕃汗王室也晉東東山井陘者昔淮陰伐趙之路連天作險蹙地成隘一夫奮守可以當萬 皇六葉賊臣忽燕師者帥漁陽雜虜踰盟津窺函谷有切天下之志時 元戎薊公慮侵軼于我乃申命 開府張公曰奉璋嚴戎式遏 公謀包百勝雄入九城名惺赫大



戎容髣髴麟閣既至登鵲鵲洪中頂四顧而歎曰虜在吾目  
矣東其口扼其喉者茲乎遂度地勢籠山鐵谷築登二削堦  
二未浹辰而畢其繚崇墉于巖半百雉雲臺冠小城于峯巔  
万仞天削設以樓櫓實以軍府鐵騎千疋虎賁万計旗拂霄  
紅甲曜日白於是明之以斥候嚴之以賞罰使夫見可而出  
逐彼者易於轉圓知難而守攻我者難於上天則雖雲梯百  
地道千班輪再生莫吾及矣其發石也星落乎九天之上伐  
鼓也雷闐六虛之表飲馬也潯池可吸而竭奮力也常山可  
踏而倒豈止啗食負刳屋振瓦飛而已哉城成 帝嘉之錫  
号承天信承於天也 公又於黃沙路築德化城示懷也慕  
容隘築滅胡城示威也復聯建三堡絕細逕也由是南北千  
里東西兩鄉飛禽走獸不得橫絕矣自祿山首逆思明繼亂

雖中原併援而晉陽無東顧之憂以此豈与夫楚池漢水剪  
起有一葦之航秦城華山劉項無橫草之闕所以氛日淨  
我功益崇 國步日清吾官益大故先太尉李公司空王公  
御史大夫管公鄧公今 相國辛公皆伊呂之倫也咸表上  
聞累遷河東鄆度兵馬使開府儀同三司荅洪勳矣君子曰  
宜哉方將運陶鈞秉旄鉞命只贊三軍鎮一面而已况此城  
隣子房之古戍借筇可追接妬女之靈泉洗兵非遠曉窺滇  
渤將日觀而齊高俯視雲霞引赤城而共色不唯禦寇之所  
兼亦棲真之地也 大使特進太常卿上柱國南陽縣開國  
子食邑五百戶張奉忠管樂口副使特進太常卿太原縣開  
國子王丕副使鄆度經略副使雲麾將軍守左金吾衛大將  
軍試鴻臚卿上柱國陳遵嶠杞梓敷游奕副使同討擊副使

特進試鴻臚卿濮陽縣開國子上柱國吳庭珙營田副使游  
擊將軍守左金吾衛大將軍上柱國張如珪防城副使光祿  
大夫試光祿卿上柱國廉明都虞侯宣威將軍守左金吾衛  
大將軍兼試少府監上柱國孫希晏將雲麾將軍守左金吾  
衛大將軍兼試衛尉卿上柱國步光庭將雲麾將軍守左金  
吾衛大將軍兼試光祿卿上柱國張鷟子將雲麾將軍守左  
金吾衛大將軍兼試光祿卿上柱國武懷進將雲麾將軍守  
左金吾衛大將軍兼試衛尉卿上柱國劉浩將定遠將軍守  
左金吾衛大將軍兼試少府監上柱國韋庭賓將雲麾將軍守  
左金吾衛大將軍兼試少府監上柱國  
育龍興將上柱國步元英押衙遠將軍守左金吾衛將

軍國美斯茂功僉願刻石成狂簡者耳自公之事國

大曆元年丙午之歲國

金石續編此記張奉璋築承天軍城以備安史之亂唐自

高祖至元宗不數武后故云六葉賊臣總燕師者謂祿山

也唐書叛臣傳

按當作逆臣

史思明攻太原李光弼使部將張

奉璋以兵守故關光弼父楷洛薊郡公光弼襲封故曰元

戎勤公時爲河東節度上元元年加太尉中書令

核舊紀上元元

年正月辛巳李光弼進位太尉兼中書令

故曰太尉李公司空王公思禮也御

史大夫管公鄧公管崇嗣鄧景山也相國辛公辛雲京也

自光弼而後凡節度河東者皆表薦奉璋故得累遷是職

張奉忠以下未能悉考也承天軍以諸史證之唐穆宗長

慶元年裴度將兵出承天軍故關以討王庭湊昭宗光化

二年朱全忠遣葛從周自土門

今獲鹿縣土門鎮

攻河東拔承天

軍天復元年朱全忠部將白奉國會成德軍自井陘入拔

承天軍梁開平五年趙王王鎔會晉王李存勖於承天軍

漢天福二年戊承天軍契丹襲擊之戍兵潰焚其市邑皆

卽此地戰壘猶存誠用武之險塞矣潯池卽漳沱周禮漳

沱禮記作惡池戰國策後漢書作呼沱山海經作漳沱詛

楚文作惡駝此碑作潯池音義並同常山

唐鎮州常山郡

今真定

府皆與承天接壤黃沙路卽黃沙嶺在平定州東南山谷

袤延六十餘里亦與承天相近記爲胡伯成撰而平定州

志藝文載作李諲承天寨記妄爲改竄割截皇六葉改爲

開皇大業尤爲可笑

以上節錄武進陸耀通金石續編

通志金石記卷十

州志於此碑錄承天軍記山右金石志略據以著錄而以

文中有開皇大業字爲疑今考原碑乃皇六葉賊臣總燕

師者師漁陽雜虜明指安祿山州志訛六葉爲大業又於

句首妄增開字遂似前代往事者宜爲陸氏所譏

枝州志不悟六

葉上之空格爲今之

指寫遂指爲開皇其云公又於黃沙路築德化城慕容

隘築滅胡城復聯建三堡皆有關晉東掌故者志亦削去

不錄

以上節錄通志金石記十

校李光弼襲爵薊公詳見金石萃編李

光弼碑天寶五載八月襲封薊郡開國公至德二載十二

月二十五日封鄭公奉璋築城在至德二載十二月前故

稱薊公舊肅宗紀上元元年閏四月丁卯太原尹王思禮

進位司空故稱司空王公二年五月乙未河東節度副大

使王思禮卒辛丑以鴻臚卿趙國公管崇嗣爲太原尹兼

御史大夫充北京留守河東節度副大使鄧景山傳上元

二年爲尙書左丞王思禮卒管崇嗣代之數月以景山爲

太原尹通鑑寶應元年建卯月癸丑河東軍亂景山被殺

代州都督辛雲京爲河東節度使舊代宗紀廣德二年九

月丙午辛雲京加同平章事故稱相國辛公按碑前稱元戎薊公據築

城時言後稱先太尉李司空王公御史大夫管公鄧公

皆就終官言其云今相國辛公者辛雲京卒大厯三年入

月元年辛正蒞官也方輿紀要州東北八十里卽唐之承天軍俗曰

娘子關以如女祠名自昔爲太原恆山之界胡氏曰承天

軍至太原府三百五十里是也通志古蹟考葦澤關卽唐

之承天軍俗曰娘子關平定州志承天軍城在州東北八

十五里承天山上宋太平興國四年廢明嘉靖二十年復

修爲承天寨張佩芳郡志考正葦澤關卽娘子關自唐於此築承天軍遂爲歷代行師要衝其路隨

桃水而下由州境西北達於壽陽今大路自井陘故關必道州城在承天軍南舊志韓信下井陘伐趙築柏井城卽

今大路是也與碑末所列大使張奉忠以下諸人史皆無

承天軍兩路傳其官曰有副使王副使節度經略副使陳遊奕副使同

討擊副使吳庭珍營田副使張如珪防城副使廉都虞候孫希

將子將等名以金石萃編各經幢證之經略討擊等使見

義成節度押衙田伾等經幢游奕防城都虞候將子將等

名見嚴震經幢新舊志於唐節鎮下武職名色不詳此可

補其闕唐至德中興皆以官賞功今以此碑及各經幢考

之節鎮部將所加之文官有至御史大夫太常卿者武官

有至金吾大將軍者文階有至開府儀同三司特進者率

不洩職故有大將軍告身纔易一醉之誚按張奉忠南陽縣子吳庭珍撰

陽縣子此其小者耳韓昌黎文宣武舊志河東節度天兵

左廂兵馬使楊僊奇封清邊郡王等軍皆有兵數此碑言鐵騎千疋虎賁萬計則承天軍兵



額萬人亦可据碑補史

通志張奉忠下有管樂陳遵下有紀梓皆不可曉按管樂疑爲諛張

之語杞梓或謂陳爲本土人傳有云杞梓皮革是也

又碑文諛張奉璋有方將運陶

鈞秉旄鉞文其跋尾可見使王縉不殺之奉璋必將如朱

希彩李希烈之爲者碑見金石錄補金石續編通志金石

記

### 陽摩山功德銘

碑高一尺五寸廣二尺二寸五分二十六行  
行字不一字徑五分正書左行今在壽陽縣

### 陽摩山功德銘文

佛維大覺聖像弥古常今寶性湛然視詳恒安應現六道  
剎無方蠢動四生等以慈念於老容口空恕心太虛雖孺道  
有談玄理俗之化向此釋門寐迫絕塵之靡多方之教不二  
之門六口頭之言乃衆生慈濟是故梵釋奉教天世口口梵

顏瞻礼偈教流傳令眾生得於化化常□□出唐□國北京  
畿□西界山名陽摩峯峯□嘉中有仙洞龍宮有石室清池  
衆嘉嵩之等巖上有功德銘云是往先大魏武定三年造衣  
服猶古消變欲暗至唐朝李家第八廣平

皇帝正天下□四海奉則北京主姓 辛雲京能心力亂出  
將入相之日縣主姓秦名善明今古雅而賢風三主欽命是  
其廿也於此陞改為袞袞座蓮花臺及方座二大士菩薩文  
殊龕中觀音勢至寺諸大菩薩蓋及仙是其□新維大唐大  
曆二年歲在丁未八月一日修盡初畢述鐫紹記 於後顯

法界衆生俱登正覺得粗淨域衆 聖佛尊礼一切智法

性之身述其詞曰 善哉世無比 難遇天中天 □量

超塵界 毛端隱大千 應示圖龕內 值願有良緣 依

行眾善業 淨土或生天 希執靈嵩 滿壁金容 諸佛

近化 □□其中

□□□□□□□□俗仁夾夫人淚男獻心獻王獻朝一心  
供養

大德齋主南綸興

令

常山太守

下

此陽摩山功德銘山上本有魏武定三年造象唐大厯二  
年縣令秦善明重修而作此記陽摩山今名雙鳳山一統  
志在壽陽北四十里兩峰突起形爲鳳翥上有五龍洞洞  
壁五色成龍洞滴水懸珠不絕與碑中有仙洞龍宮有石  
室清池相合壽陽唐屬北京辛雲京新舊唐書有傳雲京

上元二年拜節度使兼太原尹大厯三年卒造此銘時在  
卒前一年金石記引壽陽志云常山太守奉勅撰校搨本  
常山太守下無甚磨泐字形四字亦獨大此記摩岩刻疑  
常山太守另是一刻與此無涉壽陽隸北京常山隸成德  
軍銘序亦非勅撰體疑志誤

### 趙叡冲碑

碑連額高五尺八寸五分廣二尺六寸五分十九行行四  
十二字分書額題唐贈太常卿天水趙公神道碑十二字  
篆書今在  
虞鄉縣

唐故同州河西縣丞贈虢州刺史太常卿天水趙公神道碑  
并序

尚書兵部郎中安陽邵說撰

左衛率府兵曹參軍集賢殿待 詔琅邪王瑀書并篆額

惟天水趙公諱獻沖公惟隋員外散騎常侍平東將軍渭源公顯和之<sub>玄</sub>孫開府儀同三司博州刺史世立之曾孫 皇朝監察御史君煦之孫號王府法曹參軍徵之子自渭源四代咸著清德洎公纂承嘉聞益彰志業貞簡形儀朗異以孝友謹敬協柔昆弟以義禮誠純接奉朋交文蔚行茂顯于當世 天后時應明堂大禮科 上異其對授陝州陝縣尉轉汾州平遙尉露劇之地以幹敏稱秩滿從調吏部侍郎蕭至忠以公所試超等授大理評事公迫於祿養請署同州河西丞贊貳其政貶輯吏肅劇賊遁遁伏姦不與縣六百石郡二千石皆受成仰辨而已道長運速奄忽遷殂以景雲二年冬十月二旬有一日終于縣館享年五十二及夫人平陽敬氏卒以開元廿四年四月廿一日合祔于虞鄉縣五老原

初公寢疾告其二子良器良弼曰吾祖成季宣孟忠勲炳著  
迨漢吏部尚書融晉黃門侍郎道亦能勦攘寇難捍衛王室  
二祖皆為河東守子孫因徙家焉由魏歷隋位與時易爾後  
仕唐三葉而未登吉祿以吾祖宗之福豐慶演固不當湮抑  
淪廢意爾曹爾嗣其將必有達人洎公即世適廿歲而良器  
官至中書舍人未五十歲而良弼官至陝華等七州刺史御  
史中丞浙東嶺南兩道節度使太子賓客

（玄）宗朝以

嗣子參掌 綸誥追贈公虢州刺史夫人平陽郡太夫人

肅宗朝以次子節制方面案贈公太常卿

今聖

踐極嗣孫密邕薰復縱袞等咸擅才業宦成三署竟如公疇  
昔之所識於戲趙氏再世昌茂克大其門皆虢州祇奉先軌  
貽裕後續仁積訓深之所致也宜其誕受光飾享茲徽章敢

篆石立表紀旌風烈銘曰

德積於微業成而彰先時蹇舛通羨其昌於烈趙公亶惟貞  
良砥修行學顯茂家邦施子及孫再世呂光登朝就烈佩玉  
鏘鏘澤潄本根沃潤黃腸有苾遺風久逾馨香於斯篆刻  
裕美無疆

大曆四年歲在己酉五月戊辰朔十五日壬午建

按碑金石萃編已著錄叡沖新舊唐書無傳邵說有傳由  
進士官長安令秘書少監吏部侍郎太子詹事不言爲兵  
部郎中傳言說爲史思明判官史敗降郭子儀按史朝義  
平在廣德元年以唐制考之說爲兵郎在長安令後秘少  
前金石萃編碑敘叡沖先世諸人隋唐書皆無傳又云天  
后時應明堂大禮科永昌元年正月天后享明堂應舉當

在是年碑寢疾告其二子曰吾祖成季宣孟忠勳炳著迨

漢吏部尚書融晉黃門侍郎元亦能剿攘寇難捍衛王室

趙融附見魏書趙逸傳逸天水人十世祖融漢光祿大夫

趙元見晉載記子良器良弼亦無傳以上節錄金石萃編以今縣志

碑文及揭本校之晉黃門侍郎元皆作允碑系原諱字晉書郭

默庾亮傳有趙允通鑑亦累見成帝世爲將軍良器仕履

可考者元和姓纂唐監察御史趙君煦曾孫良器中書舍

人河東人唐會要開元七年文辭雅麗科趙良器及第國

秀集有兵部員外趙良器詩全唐詩傳良器官兵部員外

郎郎官石柱題名有倉部員外郎趙良器定命錄趙良器

歷任十一政至中書舍人卒虞鄉縣志唐中書舍人贈太

子少傅趙良器碑吏部郎楊綰撰唐會要贈鄴郡太守趙



良器謚曰元良弼仕履可考者郎官石柱題名有左司員外郎趙良弼舊唐書肅宗紀上元元年十月壬申廬州刺史趙良弼爲越州刺史浙江東道節度使碑云良弼官至陝華七州刺史而不言州名會稽嘉泰志唐會稽太守題名記趙良弼自廬州刺史授節度使加御史中丞改嶺南節度使虞鄉縣志唐陝華廬澧撫越廣等州刺史御史中丞嶺南浙東

原刻誤西

兩道節度使太子賓客襄武縣開國男

贈揚州大都督趙良弼墓碑顏真卿撰良弼歷官略具此碑題碑所言七州蓋指陝華廬澧撫越廣也又按碑云今聖踐極嗣孫密邕薰復縱袞等咸擅才業宦成三署而不言居何官今以縣志考之御史中丞密施州刺史邕禮部員外郎薰工部侍郎縱侍御史袞太子右庶子天水郡公

復皆叡沖諸孫又縱見舊紀大厯十二年有戶部侍郎趙縱良弼子永陝淮亦見縣志而碑敘諸孫不及當以未成宦故叡沖官河西丞卽世卅歲以子良器爲中書舍人贈號州刺史按叡沖以景雲二年歿下距開元二十八年適值三十歲未五十歲以良弼官節度而贈太常卿肅宗上元年又按今聖者指謂代宗碑云宦成三署者謂爲郎耳密縱皆至中丞侍郎則又非說撰碑時之官累代華顯門籍勳閥爲虞鄉望族叡沖疾終之言斯有徵矣碑見金石萃編寰宇訪碑錄平津讀碑記通志金石記

薛嵩碑

碑高八尺九寸廣四尺二十五  
行行六十五字分書今在夏縣

唐故開府儀同三司檢校尚書右僕射兼御史大夫相州刺

史昭義節度使平陽郡王贈太保薛公神道碑銘

并序

尚書禮部郎中程浩撰

朝議郎守梁州都督府長史武陽縣開國男翰林待詔

韓秀實書

地有塢鬱之氣在河汾上星有焜燿之精左畢昂下受其氣  
閒出為方伯應其精代興為神將焯有休績

平陽王

公諱嵩字嵩河東萬泉人其源夏車正漢大夫之後也祖  
官至代州都督左武衛大將軍諱仁貴考幽州長史節度使  
攝御史中丞右羽林大將軍汾陰縣男贈太子太傅諱楚王  
王侯相繼勲寵更盛公天姿神骨端肅正直理春秋尤重繁  
露讀兵略偏好陰符季十五以隨先將軍多在恆碣見  
朔雲連海胡騎入塞羈馬環燕甲突圍朝戰控弦夜獵以

勲著受署轅門自後獻盧龍□□謁

蓬萊之殿入則參

戴鷄出則追射雕天寶末屬星謫于天薊門有暴兵之變羿  
澆相濟再陷□師公命懸狹狵之口心馳 象魏之下迺慨  
然顧其家老曰吾世建邊勲身荷 國寵上不能死節報

國下不能滅敵立家今為逆虜將兵實所未忍然呂束  
身歸 朝本吾志也歸則獲罪罔由以樹大勲亡命從虜

非吾心也從則握兵□可以建大節將刼盟報 主斬

將歸朝爾其志之吾有願矣遂陰約叛命密獻封章見

國家有義士宗□以潛山虔繫候掩軍尉以乘城受執公皆

護而釋之望故□拜 王師免冑揮血視環牆歸更數稔

矣寶應歲

皇帝續乾坤之正位忍河洛之殘寇北單于以大旗千隊中

羽林以霜戟萬□霆奮馳行遂荒大東公□是召以麾下咸而謂曰

今聖人龍躍九天澤浸四海用漢光制竇融入而受封徵魏文令黃權歸而加錫吾屬可泥首請命席藁伏辜無乃後乎言未卒遇亡虜奔北爭舟截河公命塞杏園之津絕松漠之路羣兇梟首海塞克清公之謀也遂領所部精甲三萬成縣卅獻狀闕下

□君義之特拜刑部尚書兼御史大夫相州刺史節度使又封高平郡王加賦二百戶署其府為昭義軍歸□也當大軍百戰之後邑無完聚人無噍類公布五州之新政舉三軍之闕令條上而陳之訓農也庀禾□戒以□□菟乘也補駮牝班以為政養卒也錄于楯置君子營平稅也均庾斛開廩人□行之葺年閭兵至參萬戰馬至參千然

後講求鄉燕備□亞之禮嶺脩鄉射陳金石之樂衡漳之下  
政用大和繇是月班朝貢歲行軍賜左執圖右執贄帥諸侯  
而覲 天子會東夏有故溫詔戶之遷尚書右僕射改封  
平陽郡王寵□績也公因寓書于四境曰昔桓文主盟貴翼  
戴乎魯衛分政重脩睦乎今小不恤隣大不恤國非所以享  
王爵也發幣以結之購士以說之曰□□河□之使垂橐  
而入執玉而□公之力也夫智則□塞化則神速惠工通商  
為元侯之式勇則電發攻則河決摧堅破剛為上將之傑若  
然者非智決之勇安之守則全戰則剋經其亂能保於身謀  
其身不忘於□可謂大功明略守義全忠者歟大○七季冬  
十有二月景寅薨於礪州

皇上聞之贈以三公印綬九原賻槨以明年十月歸葬于夏

縣 先將軍之塋中謁者□護宦於軍者俾為之襄遵舊  
典也公性蘊純素

運遭□遇少也師儉慕平津布被與伯仲共之及賜慈童錫

宛馬先奉二昆長也重賢慕平原珠履與賓客周之及辯秦

鷄議趙獵尤招說士鄴下君子以為美談嗣子十人長曰平

檢校國子祭酒兼侍御史行純志銳充令緒也次等誦詩執

禮章孝誠也伯昆右金吾大將軍仲昆太子少師內友外忠

助王室也隋武之理晉軍父及子盛度□之握漢節兄連弟

□莫之尚焉相與負土銜涕撰錄勛績見微直筆篆于玄石

銘曰

平陽慶鍾三葉翼聖唐樹勲于鄴世重神將功興薊

門壯圖電舉雄略風飄運厄兵甚身陷誠存志掃 國難

誓酬 主恩三疊登壇九命作伯繡衣驚冕金劍玉帛撫  
俗五州講德有經主盟四封交修以寧潤人雲雨震敵雷霆  
獻贊執瑞朝覲禮備牙旗曉飏將星口墜哀甚中軍悲連七  
萃追冊太保寵葬大勲山河故國松柏新墳刻石崔嵬長旌  
冠軍

太原郭端模勒并刻字

校碑題尚書禮部郎中程浩撰朝議郎守梁州都督長史  
武陽縣開國男翰林待詔韓秀實書 欽定佩文齋書畫  
譜程浩代宗時人金石錄唐左僕射裴冕墓志大厯五年  
程浩撰並書唐藏用上座院序貞元四年程浩撰吳通微  
行書然則浩固唐大厯貞元間工文與書者書史會要韓  
秀實爲翰林善楷八分金石略唐平蠻頌韓秀實八分書



墨池編唐鮮于氏里門頌韓秀實八分書通志金石記秀實書亦唐隸之佳者金石續編大厯十二年平蠻頌秀實

結銜爲朝議郎守梁州都督府長史武陽縣開國男翰林

待詔與此碑合碑始見集古錄碑云公諱嵩字嵩河東萬

泉人

舊書作絳州萬泉人

祖代州都督左武衛大將軍仁貴考幽州

長史節度使攝御史中丞右羽林大將軍汾陰縣男贈太

子太傅楚王舊唐書嵩傳祖仁貴高宗朝名將封平陽郡

公父楚王爲范陽平盧節度使校唐開元十三年正月乙

酉升幽州爲大都督府以幽州長史領節度使舊張守珪

傳二十一年轉幽州長史兼御史中丞營州都督河北節

度副大使元宗紀開元二十七年王斛斯爲幽州節度使

皆可證天寶元年二月幽州始改范陽郡楚王於二十年

爲幽州節度二十一年張守珪代之

舊契丹傳開元十八年可突干殺邵固率

部落并脅奚眾降於突厥二十年幽州長史趙含章破之明年可突干又來抄掠幽州長史薛楚王遣郭英傑吳克勤歸知義率精騎萬人追擊之官軍大敗詔以張守珪爲幽州長史兼御史中丞經略之此楚王以二十一年罷幽州之

證楚王罷幽州在未改范陽前當從碑稱幽州長史節度爲是舊傳舉後改郡名加之非也碑云天姿神骨偏好

陰符年十五以隨先將軍朔雲連海胡騎入塞羈

開馬環

燕甲突圍朝戰控弦夜獵以勳受署此嵩從父幽州立勳

得官之證又云謁蓬萊之殿入參戴鵬出則射雕是嵩嘗

入宿衛舊傳但言少以門蔭落拓不事家產有膂力善騎

射自天下兵起束身戎伍委質逆徒不言其先爲何官此

碑能詳以先仕履良可寶貴碑云天寶末薊門有變昇澆

相濟指安史繼亂事碑又有顧其家老云云此撰碑者曲

爲之詞以掩事賊之恥碑云見國家有義士至皆護而釋  
之一段此又明嵩効忠之證嵩唐室世勲偶陷賊庭義在

當爾撰文者工於屬筆亦可略見碑云寶應歲皇帝續乾

坤之正位忍河洛之殘寇北單于以大旗千隊

謂回紇

中羽

林以霜戟萬

關肅魚朝恩所將禁軍

霆奮颺行遂荒大東公召麾下

威而謂曰今皇龍躍九天澤浸四海吾屬泥首請命無乃

後乎又云塞杏園之津絕松漠之路羣凶克清公之謀也

按史言朝義敗於相州嵩降据碑則嵩於王師北出已背

朝義杜載津塞絕其北竄尙預有平賊之勳碑云遂領精

兵三萬成縣卅獻狀闕下特拜刑部尙書云云通鑑寶應

元年十一月丁丑鄴郡節度使薛嵩以相衛邢洺四州降

廣德元年閏月癸亥以史朝義降將薛嵩爲相衛邢洺貝

磁六州節度使舊傳以嵩爲相州刺史充相衛等州節度  
觀察使而不言加刑部尙書御史大夫封高平郡王可補  
史闕碑又云當大軍百戰之後邑無完聚人無焦類公布  
五州之新政舉三軍之闕令訓農蒐乘云云與舊傳所言  
嵩感恩奉職管內粗理合碑云帥諸侯而覲天子會東夏  
有故溫詔戶之遷尙書右僕射改封平陽郡王

舊傳累遷  
檢校右僕

射

大曆七年十二月景寅薨于磁州舊傳通鑑皆云嵩卒

在大曆八年正月蓋據奏到時

通鑑注唐武德元年分相  
州置磁州貞觀元年廢薛

嵩旣得節  
表置磁州

碑云以明年十月歸葬於夏縣先將軍之塋長

子平檢校國子祭酒兼侍御史行純志銳補史嵩薨子平  
年十二將士脅以爲帥平夜奉父喪逃歸鄉里碑謂行純  
志銳者當以此碑有次等誦詩執禮云云新唐書世系表

嵩子平韓國公雲右監門將軍昌朝保信軍節度使詒謀  
兵部侍郎昌族陳州刺史昌期儀州刺史皆登華要可謂  
盛矣

此外尚有昌宗昌運舉發

通鑑舊書皆云嵩弟尊以碑證之實嵩

兄新書世系表嵩兄岌右金吾將軍粵相衛節度使太子  
少師碑云伯昆金吾大將軍仲昆太子少師者卽其人通  
志金石記嵩祖仁貴名禮父楚玉字瑤並見世系表磁字  
作礪與李抱眞碑同碑云嗣子十人世系表列名者凡十  
一人今薛氏諸碑無復存者而此石獨覓臨道左抑何多  
幸按薛氏自仁貴後訥爲宰相楚玉嵩粵皆涖方鎮平以  
効節本朝秉旄鉞者逾二十載從亦至將軍五世將相洵  
稱華胄中微而振則自嵩始碑見集古錄寶刻類編通志  
金石記

妒神頌

碑高四尺六寸七分廣二尺七寸三分前刻序頌二十四  
行行五十三字後列職名七行行三十九字行書今在平  
定州東北九十里

娘子關介之推廟

妬神頌

并序

判官游擊將軍守左清道率府率賜紫金魚袋上柱國李  
誼撰

粵若稽古徵諸陳迹雖年移代謝而損益昭然是以宋王高  
唐之倖盛傳於南國曹王洛神之賦永播於東周莫不事載  
圖書名標史策晉東之美者有如水之祠焉其神周代之女  
介推之妹初文公出國介推從行有割股之恩無寸祿之惠  
擢將畢命肯願微軀儀形飄殞於口煙名跡庶幾於不朽後  
縱深悔前路難追因為滅焰之辰更号清明之節妹以兄涉

要主身非令終遂於冬至之後日積一薪烈火焚之口其易俗諺云百日斫柴一日燒此之謂也閭境之內嗜敢不恭順之則風雨應期違之則雷雹傷物兄則運心以求合我則屢室以全真兄則禁火以示誠我則焚柴以見志惟兄及妹與世殊倫傳曰介之推終不言祿祿亦不及渾天記曰著寒食者為助陽氣用厭火星所說不同互有得失其來遠矣安可闕如縱因事之宜亦自我作古祭法曰其有廢之莫敢舉也其有舉之莫敢廢也東北自土門之口西南距盤石之山方圓百里別成一境天寶中一賊臣背化國步猶艱塗炭生靈焚燒甲第伊我遺廟巋然獨存簪裾近叶於當時庭宇更新於往日性惟孤直虛見授於妬名行本堅貞實堪垂於令範今幸遺塵不動海水無波敢爾小戎曷足為惠昔虞舜至

聖尚有苗人之誅殷湯至明豈無葛伯之伐蓋以 君為元  
首臣作股肱飄飄轅門藩屏王室乃命 河東節度副大使  
兼工部尚書大原尹北京留守薛公諱兼訓警此 禁聞

公掌握衡鏡心韞韜鈴勢若轉規謀如泉湧運籌帷幄孫吳  
詎可比其能料敵戎旂衛霍不足方其妙浙江遺愛但美還  
珠汾浦來蘇惟欣去默申命 我承天軍使節度副使前永  
平軍節度右廂兵馬使銀青光祿大夫試鴻臚卿同山南東  
道節度經略副使上柱國党公諱昇鎮茲巨防公 天子忠  
臣 元戎外聳志惟清而惟謹行不詭而不驕往往清臺職  
居惣統近歸本道位處專城投膠之義遠聞挾纊之情久著  
爰自至正星管再周路不拾遺人皆樂業長筵繼日士忘其  
勞細柳垂陰衆歌其美水殲成而永逸聚米難傳軍井達而



少閑伏波不竭 君依神以傲福神依君以庇躬事勢相因  
理亦條貫固宜書其已往播於將來貞石旣磨斯文可作尔  
其泉湧祠下蓄為碧潭飛入大河噴成瀑布湍湑衆濁雜雷  
霆之聲盪雲波日類風水之會經匝寒而氣蒸萬象燄爨  
而清潤一川灌木扶疎引柔條而接影纖苗蘿靡夾高岸而  
隨風自古及今非軍則縣未嘗不揆月撰日脩其享禮春祈  
秋賽庶乎年登巫覡進而神之聽之官寮拜而或俯或仰旣  
而坎坎伐鼓五音於是克諧戔戔側弁三軍以之相悅 公  
之德也如此神之應也如彼且河北數州山西一道戎衣以  
錦繡戎奠以琬羞無晝夜而息焉豈翰墨之能諭咸以商者  
求之而獲利仕者禱之而果遷蠶者請之而廣收農者祈之  
而多稔不然則奚能遠迓奔湊奉其如在盖聞有而不言謂

之隱無而言之謂之誦又聞誇目者尚奢愜心者貴當承  
命述事敢不勉旃謹因退食之餘竊比陳其梗槩也銘曰  
凡有異行宗之曰神匪害於物寔利於人兄則禁火妹乃積  
薪共為佳節在乎芳春今古千齡方圓百里德音無斁蒸嘗  
不已祭具珍羞服先錦綺所求必應高山仰止 將軍塞下  
細柳營邊晴開朝鏡霧雜鑪煙神理昭昭靈草芊芊紀諸令  
範光我承天井陞西南太原東北妬祠之水澹為黛色跳波  
噴浪如有可則古往今來源流不忒興雲致雨倅 造化力

①①昂昂象 君之德或祈或禱永無休息神之歆之福善

①①極

大唐大曆十一年歲次丙辰五月丁亥朔十六日壬寅巳  
時建

副使同經略副使特進試鴻臚卿上柱國廉明並奕副使雲  
庵將軍守左金吾衛大將軍試衛尉卿上柱國步光庭都虞  
侯冠軍大將軍守左金吾衛大將軍試太常卿上柱國王曇  
將太常卿楊進朝光祿卿張鸞太常卿聶庭賓散將衛尉卿  
劉浩太常卿馬崇俊太常卿崔元英太常卿蔡希勝太常卿  
梁昱鴻臚卿巨超俊殿中監葛日新判官節度逐要官涼王  
府司馬許勉左武衛將軍郭崇儁左武衛翊府中郎將辟閭  
珣孔目官太常卿張崇玆節度隨身官右翊府中郎將燕潤  
國副將太常卿孟大津太常卿曹龍興太原府豐川府折衝  
郭季膺衙官代州別駕姚庭秀左清道率劉廣成惣管太常  
卿□□僧左金吾衛大將軍寶光超左武衛翊府中郎將陳洽  
按碑題判官游擊將軍左清道率府率賜紫金魚袋上柱

國李謹撰遺山集平泉詩注平定土俗傳介子推被焚其  
妹介山氏恥兄要君積薪自焚號曰妒女祠其碑大厯中  
判官李謹撰與今揭本合任昉述異記并州妒女泉婦人  
不得靚粧綵服至其地必興雲雨平津讀碑記魏書地形  
志石艾縣有妒女泉及祠唐會要高宗將幸汾陽宮并州  
長史李冲元以道出妒女祠俗云盛服過者必致風雷之  
災乃發萬人別開御道狄仁傑謂天子行風伯清塵雨師  
灑道何妒女之害耶是祠自唐前已有之唐書宰相世系  
表李謹鄆州司功參軍碑云天寶中賊臣背化塗炭生靈  
焚燒甲第伊我遺廟巋然獨存此指史思明犯太原事碑  
又云乃命河東節度副大使兼工部尚書太原尹北京留  
守薛公兼訓警此禁闡舊唐書本紀大厯五年七月丁卯

以浙東觀察使越州刺史薛兼訓爲檢校工部尚書太原  
尹充河東節度使碑有掌握衡鏡云云按通鑑僕固懷恩  
平史朝義兼訓爲都兵馬使穆員鮑防碑光弼上將薛兼  
訓受專征之命於越而輟公以介之此皆兼訓以勦起家  
之證碑云浙江遺愛但美還珠者以兼訓嘗鎮浙東也碑  
又云我承天軍使節度副使前永平軍右廂兵馬使銀青  
光祿大夫試鴻臚卿同山南東道節度副使上柱國党公  
諱昇鎮茲巨防星管再周以碑末證之昇當於大厯九年  
鎮承天碑末題大厯十一年歲次丙辰五月十六日建舊  
唐書本紀大厯十一年十二月鮑防權知河東留後北都  
留守薛兼訓病故也碑撰五月故仍云薛公

今舊書刻本  
作段秀實知

河東按秀實於時爲涇原留後  
不得至河東今據鮑防傳正

碑末所題官有副使廉明

游奕副使步光庭都虞侯王曇將楊進朝張鸞聶庭賓散  
 將劉浩馬崇俊崔元英蔡希勝梁昱巨超俊葛日新判官  
 許勉郭崇儁辟闔珣孔目官張崇珍節度隨身官燕潤國  
 副將孟大津曹龍興郭季膺季膺官金石續編作豐州府折衝今場本作豐川府新書  
地理志太原府二衙官姚庭秀劉廣成總管闕僧寶光超  
十有豐川續編誤陳洽校見承天軍城記碑末者廉明防城副使步光庭  
 將承天記雲麾將軍守左金吾張鸞將雲麾將軍守左金  
大將軍兼試衛尉卿上柱國庭賓龍興亦並見按副  
光祿卿上柱劉浩子將庭承天記  
國承天記庭賓龍興亦並見按副  
屬如今勇營幫統營務處總辦營哨官等名無品唐時軍  
級金吾將軍卿等乃其本官如今記名提鎮也鎮職名如此亦云繁矣碑見金石錄補寰宇訪碑錄平津  
 讀碑記金石續編通志金石記

山右石列叢編卷七